

interview met.....

[Jubileum: 50 jaor rapido](#) >> [Jubileumjaar](#)



Stel dich efkes veur.....

Van mien elders kreeg ik de naam Paul Koetsenruijter, det is al 56 jaor geleeje en dae naam heb ik gehalde.

Inmiddels bin ik al 31 jaor getrouwd met Monique en wie det dök geit hebbe we inmiddels 'n dochter en unne zoon.

Ôs dochter Krista studeert genaeskunde in Maastreech.

Giel, ôzze zoon studeert in Tilburg rechten en management.

Ikzelf môt auk nog waat doon veur de kos en werk as docent nederlands beej 't Valuacollege.

Nao diverse fusies op mien vurrige werkplekke bin ik dao sinds 7 jaor actief .

Waas 't nog leuk naó Rapido.

Ik bin 15 jaor lid gewaes van Rapido tot 1995.

Op vriédaag waar op schoël miene zwaorsten daag.

Asse dônderdaags dan vreej laat thoès bis, brik dich det op 'n gegaeve moment op.

De veurbereidinge veur de vriédaag schoote d'r beej in, dus bin ik op dônderdaagavond gestop met sporte.

In 't algemeen probeer ik 't mich leuk te make maar nao 1995 heb ik 'n paar tropejaore gehad. Neet op sportief gebied maar waat werk betref.

Ik had dreej verschillende werkgaevers en werkde o.a. beej 't Marianum.

Op 't MBO college waar ik lierlingbegeleider en bezöch de diverse bedriëve wao de lierlinge mei te make krege.

Al mien werkgaevers kwame op 't idee um te gaon fusere en dan mösse maar aafwachte waat d'r veur dich oètrolt.

Waat unne ônröstige tièd, maar oèntintelik is toch alles good gekômme.

Taege 2000 ging ôzze Giel op volleybalgebied aan topsport doon en as elder bisse netuurlik trots op dae jông.

Weej stimuleerde zien talent en de consequentie daovan is desse d'r zelf dan auk vuel tièd in môs staeke.

Ik heb um jaore langk everal naortoe gebrach in Nederland en België veur wedstriède en traininge, weej zien same hièl waat eurkes ônderwaeg gewaes.

Noow is Giel 20 jaor, speult beej Hajraa, de studentevolleybalvereniging in Eindhoven en haet zien studie veurrang gegaeve.

Waat unne verstandige jông eigelik, zoel hae dat van zien vader hebbe?

Waat is de leukste of vervaelendste herinnering die se hebs oèt diene Rapidotied.

Ut wiekend aan de Bostalsee leet mich nog vers in 't geheuge.

Ik waar lid van de Köskepel en weej brachte toch un gezellig stökske mezièk.

In de zaal naeve 't café waar 'n broèlof aan de gangk en eemus van Rapido kwaam op 't idee um dao 'n serenaatje te gaon bringe.

Stel dich veur, wildvraemde minse, auk nog pruuse, en dan gewoën naor binne gaon met tig man van 'n " juxkapelle" um waat te speule.

Wae velt det in en duit det gewoën, beej Rapido zien ze neet zoë verlaege.

De ceremoniemeester had neet 't lef um zôn groëte invasie weer naor boète te steure en achteraf veel de meziek auk nog good in de smaak.

Nao 'n venloos kwarteerke zei de verstandigste van de club, ôzze veurzitter Pierre Vercoulen: Liebes Brautpaar, wir wünsch enoch noch ein schönes Fest aber jetzt wird die letzte nummer gemacht en det deej die "juxkapelle" auk.

Ik weit neet wie 't broedspaar det begrepe haet maar ik heb dae klasse speech nog steeds neet vergaete.

Vlakbeej 't hotel loog 'n zwumbad en ik ging same met Frans, Hub, Twan en nog 'n paar andere 's-morges efkes zwumme.

De Bademeister dach dette 'n paar kleuters veur zich had, we mochte niks en woorte scherp in de gate gehalde.

We meuste de badmuts op, we mochte neet renne, we meuste de kleier netjes ophange, hae keek nog net neet achter de oère.

Ut letste commando waar: **alle zuerst duschen**

Eine van ôs goof daarop 't antwoord: dét heb ik ièrder gehuerd.

Ik weit neet of de Bademeister det gehuerd haet maar we zien braaf allemaol ônder de douche geaon.

De wils toch genne verkièrde indrök achter laote!

Welke sport duisse noow en waat zien dien hobby's.

Hebse efkes tièd want ik heb vuël hobby's en doon waat minder aan sport.

Mezièk is 'n belangrièk ônderdeil in mien laeve.

Beej de kôskepel speulde ik schuuftrombone en det doon ik nog.

Op schoël doon ik al 'n aantal jaore mei met de schoëlmusicals en speul deze kièr beej de "West Side Story" mei in 't orkes.

Vaerder bin ik al waat jörkes lid van 't Fransiscuskoer op de maagdenberg en bin dao veurzitter van.

Zeker 15 jaor zoot ik as PR-man in de organisatie van 't Festival Religieuze Muziek met Gerard Franck as initiatiefnemer.

Jaomer genôg woort 'n aantal jaore geleeje de subsidie veur die evenemente ingetrokke en waas 't nao de 21e editie aafgelaupe.

6 jaor langk bin ik lid gewaes van unne gemingde Close Harmony groep, mezièk op weer 'n andere meneer.

Thoès speul ik aaf en toe piano as ôntspanning.

As sport heb ik neet vuël te melde.

Nao 6 jaor tennise meus ik stoppe doordet ik las had van unne tenniser, tja dan mósse waat anders zeuke um den tièd um te kriège.

Mien abonnement beej de fitnessclub is eigelik weggegoëjd geld volges Monique, de Sauna sprik mich ièrlik gezag 't meiste aan.

Enfin det is auk te zeen aan mien euverhaemde die waat grutter zien gewaore.

Toch bin ik gaar neet lui aangelag, ièrder erg ônröstig en ik doon gaer vuël dinger tegelièk want op vakantie wandele en fietse we geregeld.

Vaerder kaok ik ens in de 6-7 waeke met 'n grupke manne en ein of twië kièr per jaor meuge de vrouwe ôs kaokpoginge kômme keure.



Monique is neet altièd blij met mich en ik begrièp det bes. Maar asse geregeld weg bis kriegse auk gen ruzie .

Geisse gaer op vakantie en welke plek haet dien veurkeur.

As 't effe kan zien we elke schoëlvakantie weg en meestal met de caravan.

Zoëas ik al ièrder gezag heb bin ik erg ônrôstig en wil gaer telkes waat nièts zien.

Variatie haet mien veurkeur.

In de zomer trekke we rônd met de caravan in Frankriëk, Italië of in Slovenië.

Nao de fusies van 'n aantal jaore geleeje hebbe we in Slovenië unne maond rôndgetrokke in de buurt van Bled.

Det had ik toen waal nuëdig um mich weer op te laaje veur 't nijeje schoëljaar.

15 jaor geleeje zien we veur 't ièrs met vastelaovend naor de wintersport gegaon en we ware metein verkoch.

Vastelaovend geit heej gewoën door netuurlik maar asse d'r niks van huers misse 't auk neet.

Lekker 'n aantal daag op de ski's in de frisse lôch, dao knap unne mins van op.

Verkleijd zien we in Oësteriëk eigelik auk maar we hoove ôs neet te schmienke, det leit te vuël aaf ônder ut skieë..

Um 't aaf te lière gaon we in 't naojaar met de caravan naor zîé um te wandele en oèt te weije.

Zoë kriege we 't jaor bes vol en staon ik de res van de maonde oètgerôs veur de klas.

Waat goof dich tot noow toe de grutste kick.

Zelf vleege waar miene grutste wins, neet met unne windvogel maar op eige krach van baovenoèt alles bekiëke.

Op mien 40 heb ik op vakantie eemus ôntmoet dae dezelfde wins had.

We hebbe same unne cursus delta-vleege gevolg, det waar super.

Waat un gaaf geveul guf det en waat 'n stilte dao baove.


Messchien bin ik in 'n vurrig laeve waal ein of andere raufvogel gewaes met stevige, breije vleugels.

Wie ik einmaol de smaak te pakke had bin ik in België nog unne cursus zweefvleege gaon daon.

Det beveel good en 2 jaor langk bin ik lid gebleve van die plezante club.

Later heb ik op vakantie in Frankriëk nog unne cursus Parapente gevolg, unne gekke naam misschien maar 't biësje kin maar unne naam hebbe.

Vleege, waosse zelf alles ônder contrôle haes behalve de wind netuurlik, det guf mich de grutste kick.



Op welke plek mósse volges dich eine kiër in dien laeve gewaes zien.

Mien antwoord zal dich neet verwôndere dink ik.

Op den toep van unne berg staon op pak weg 3000 maeter huegte, die wieldsheid, die rös. Ik kin 't idderein aanraoje.

Of met unne zweefvlieger of delta-vleege op 2 km huegte allein maar gleije en de waereld van baove oèt bekiëke.

Laot de stilte op dich inwerke.....de gluifs dien oëre neet.

Ik zoel zegge, probeer 't ens, det is ultieme ôntspanning.

Met wae zoelse unne kièr 24 oor door wille bringe en waarom.

Ik zoel gaer unnen daag op reis gaon met Hans Dorresteyn, dae volges mich de leukste cabaretier van Nederland is.

Hae haet heerlijke gortdruege humor in ziene typische zwartgallige stiel.

Met ziene zang zal hae noëts Idols winne maar de teks is klasse.

Met zien autobiografie stelt hae zich behuerlik kwetsbaar op waat neet idderein zoel dörve.

D'r zal bes geregeld 'n glaeske gedrônke waere in die 24 oor.

Waat haet de grutste impact gehad op dien laeve.

De keuze um Nederlands te gaon studere haet dink ik groëte invloed gehad op de res van mien laeve.

Mien interesse loog beej de fysische geografie == de natuurkundige aardrijkskunde.

Waarschienlik had ik dan got wet wao gewoënd um mien werk oèt te kinne veure.

Det waar veur mich gen probleem gewaes want ik veug mich euveral.

Nao effe twiéfèle is 't toch Nederlands gewaore

Daonao heb ik Monique lière kinne en det is erg hônkvas, daorum woën ik nog altièd in de gemeente Venlo.

Hebs dich 'n laevesmotto en waat is det.

Mien laevesmotto is: **NO RISK NO FUN**

Wao hebse unne groëte haekel aan.

Ik heb unne groëte haekel aan sniejboëne.

Ik heb 'n aantal jaore beej de Fransiscanen op 't internaat gezaete en dao woord ièrs geboek door de nône.

Op 'n gegaeve moment kreges we unne börgerkok en dae had volges mich 'n boënecomplex of zien vader waar gerdeneer en kós de boëne neet kwièt waere.

We kreege boëne, boënesoep, boënestamp, sniejboëneschötel en gangk zoë maar door, ze kwame mich de oëre oèt.

Ik heb auk unne haekel aan discriminerende opmerkinge, laot iddere mins in zien waerde.

Trouwes ze mótte mich auk neet veurschriève waat ik mótt doon en laote, dao kin ik neet taeges.

(redaktie: Monique zit beej dit antwoord stevig jao te knikke)

Wao bisse 't meiste op aafgeknap.

Meimake det ein van dien elders, in dit geval mien mooder, geit dementere en desse ze "geistelik" kwièt wuers.

Ze is 88 jaor en aaf en toe besef ze zelf good waat d'r aan de hand is.

De wils ut verandere maar de hebs d'r genne vat op.

De kins det machteloos geveul waal, "je staat erbij en je kijkt ernaar".



Zoelse aan dichzelf iets wille verandere en zoë jao, waat dan.

Jao, ik zoel mien "Gode-liéf" van vruuger weer truuk wille hebbe, want 't wuerd noow allemaol waat rônner.

Ik had gehaop det ik met vleege ônderwaeg waal waat kilo's zoel verleere, maar dae vogel

geit neet op.
Geneete van de gooje dinger in 't laeve is auk belangriek.

Elly van Elswijk